

AGAMA ITU NASIHAT

(8)

Perantaraan untuk Mensucikan Jiwa

Tiap-tiap manusia yang hidup mesti diliputi oleh tiga perkara yang mustahak: Iktikad atau kepercayaan, perkataan atau perbuatan. Tiga perkara ini menjadi perantaraan yang mustahak bagi mensucikan jiwa asakan sahaja diletakkan pada tempatnya sedang kalau tidak benar menempatkannya boleh membawa kepada kerosakan jiwa yang serosak-rosaknya.

Iktikad yang hak, perkataan yang benar dan perbuatan yang baik dapat membuat manusia kepada jalan bahagia dan selamat yang akhirnya tentu akan suci jiwynya daripada segala nista dan aib: Sebaliknya iktikad yang batil, perkataan yang lengcong dan perbuatan yang buruk itu boleh membawa manusia ke lembah neraka dunia dan hina yang kemudiannya boleh merosakkan jiwa.

Jadi orang yang hendak mensucikan jiwynya terutamanya hendaklah ia memikirkan tiga perkara itu – sudahkah ketiga-tiganya diletakkan pada tempatnya atau belum? Kalau belum maka seboleh-bolehnya usahakanlah supaya tercapai.

Memperbaiki Iktikad

Iktikad itu ertinya kepercayaan. Kepercayaan itu berbekas kepada jiwa, fikiran dan anggota badan. Iktikad itu ada dua jenis: Ada iktikad hak yang tegak atas dasar yang kuat dan tahan di uji, dan ada iktikad batil yang tidak bersendi atas pokok yang teguh dan tidak tahan diuji. Tiap-tiap orang memandang iktikadnya sendiri yang benar dan yang lain batil dan tidak benar. Lihatlah orang-orang Kristian – mereka memandang

iktikadnya mempertuhankan Nabi Isa menjadi anak Tuhan adalah iktikadnya yang benar sedang yang tidak mengaku demikian di pandangnya salah dan berdosa. Begitulah seterusnya kepercayaan tiap-tiap orang kepada apa sahaja sekalipun yang tidak benar memandang dan mengaku iktikadnya benar.

Dalam pada itu kita harus mengetahui bahawa tidak semua yang di pandang orang hak itu benar adanya dan tidak semua yang disalahkan orang atau di pandang batil itu tidak benar. Ada kalanya yang di pandang orang hak ialah batil dan yang di pandang batil ialah hak. Jadi mengukur hak dan batil itu bukan dengan perasaan tetapi dengan keterangan dan bukti, dan tidak ada yang mengetahui hakikat hak dan batil melainkan Allah Subhanahu wa Taala. Orang yang hendak mengetahui hak atau batil iktikadnya wajiblah ia mencari keterangan dan kenyataan daripada Allah. Keterangan daripada Allah itu telah terkumpul di dalam agama yang di turunkan atas Nabi-nabinya dan kitab agama yang masih tetap kandungannya dan tidak berubah-ubah, yakni tidak di campur oleh peraturan buatan tangan manusia: hanya agama Islam agama yang akhir sekali di turunkan ke dunia kepada akhir Nabi ialah Nabi Muhammad (SAW). dari sitolah seseorang mengetahui dan mengukur tentang hak atau batil iktikadnya mana yang sesuai dengan keterangan isi kitab itu tentulah hak namanya, dan mana-mana yang menyalahi atau tidak dibenarkan dalam kitab itu tidak syak lagi batil namanya.

Kita katakan mesti mengikut ukuran agama kerana ukuran fikiran, perasaan dan pemandangan itu tidak selamanya boleh dipercaya benarnya, ada kalanya terkecoh dan terkeliru dan terkadang-kadang menyakit mata batilnya.

Mata dan telinga atau penglihatan dan pendengaran menjadi perantaraan yang utama sekali bagi mengisi fikiran. Segala yang di lihat orang dapat difikirkan begitu juga apa-apa yang di dengarnya: Tentang benar atau tidaknya fikiran itu terserah kepada bukti yang nyata, penglihatan mata itu ada kalanya keliru sekalipun telah di timbang oleh kekuatan

fikiran. Yang demikian ini tidak sahaja mengenai orang yang bodoh tetapi kerap kali juga didapati daripada orang-orang pintar dan berilmu pengetahuan. Bayangan-bayangan sinar matahari yang nampak di padang pasir kerap kali disangka orang air yang sedang berayak. Fikiran yang menetapkan demikian itu juga, tetapi setelah dihampirinya baharulah diketahui bahawa yang dikatakan air oleh mata dan fikiran itu kiranya sinar matahari. Buah-buahan yang dibuat orang dari lilin kerap kali disangka orang buah yang sebenarnya : tetapi setelah diperiksa didapati bukan yang sebenarnya hanya “buah-buahan”. Contoh-contoh seperti ini terlampaui banyak: Daripadanya dapat kita ketahui bahawa ukuran mata dan fikiran itu tidak sentiasa benar ada kalanya terkeliru yang hingga merosakkan jiwa seseorang.

Telinga pula keadaannya tak ubahnya dengan mata yakni tentang tak boleh dipercayakan benar pendapatannya walaupun telah dibantu oleh timbangan fikiran. Suara kucing pada tengah malam ada kalanya terdengar oleh telinga sebagai suara kanak-kanak menangis. Fikiran ini membenarkan pendapat telinga itu tetapi setelah diperiksa baharulah diketahui bahawa yang bersuara itu kucing-kucing bukan kanak-kanak menangis.

Jadi mata, telinga dan fikiran tidaklah boleh dijadikan alat yang sebenar untuk mengetahui hakikat sesuatu, kerana tidak mengetahui hakikat sesuatu itu melainkan Allah. Oleh sebab itu seseorang yang hendak menegakkan iktikadnya supaya berdasar di atas hak hendaklah mengikut dan memimpin segala iktikad dan kepercayaan yang diterangkan dalam agama Islam dan dijamin Allah benarnya lagi membawa kepada kesucian jiwa.

Banyak kita dapati orang-orang yang dipandang cerdik dan pintar, dikatakan otaknya lebu, pengetahuan telah tersesat dalam iktikad. Di antaranya ada yang berkepercayaan tidak ada Tuhan alam jadi dengan sendirinya. Alasannya yang utama ialah segala barang yang ada itu dapat dilihat dan dirasainya. Orang yang demikian ini sangat kuat mempercayai kekuatan mata dan

otaknya pada hal tidak sedikit barang yang ada tetapi tak dapat dilihat, dan ada pula yang tak dapat difikirkan hakikatnya. Barang yang tak dapat dilihat dengan mata itu tidak bermakna barang itu tidak ada. Berapa banyak tabib-tabib yang menyangka bahawa dalam diri seseorang yang sedang diubatinya itu tidak ada penyakitnya – iaitu ditetapkannya setelah diperiksanya dengan mata, telinga dan pancainderanya dan sudah pula ditimbang masak-masak mengikut ilmu pengetahuan dan fikirannya – pada hal dalam diri orang itu terkandung penyakit yang tidak diketahui letaknya sehingga membawa kepada ajalnya. Tidak pula sedikit bilangan pencuri, perompak, pembunuh menipu dan sebagainya daripada hukuman seksa dan banyak orang yang bersalah teraniaya dan terseksa.

Ada pula orang yang beriktikad bahawa roh tidak ada pada hal orang tidak akan hidup melainkan dengan roh: Ada pula yang beriktikad sesudah mati habis segala perkara tidak ada balasan jahat atau baik bagi amalan seseorang sesudah matinya selain daripada itu banyak lagi kepercayaan yang batil yang dipercayakan oleh orang-orang yang bodoh dan pandai, seperti yang kita pernah lihat orang yang boleh dikatakan telah pandai telah meminta-minta kepada hajatnya kepada kubur, batu, kayu dan orang mati: Dan tidak sedikit yang kita dapati orang yang menyembah kayu palang, matahari, bulan, bintang, api dan syaitan.

Orang yang batil iktikadnya bolch merosakkan jiwanya. Orang yang menyembah patung yang dibuat dengan tangannya sendiri itu selain daripada merendahkan fikirannya adalah merosakkan jiwa dan rohaninya kerana ia takut kepada barang yang dibuatnya sendiri. Begitu pula halnya orang-orang yang takut kepada barang-barang yang mati dan tidak berjiwa. Orang-orang yang demikian tidak syak lagi di namakan sebodoh-bodoh orang sedang kebodohan itu penyakit jiwa yang sangat besar bahayanya.

Dalam beberapa kitab tawarikh pernah saya baca cerita Umar bin Al-Jamah dengan berhalanya yang menunjukkan kebodohan

dan kesesatan.

Riwayat ringkasnya begini:

Umar Al-Jamah adalah orang yang terkemuka dan terhormat daripada kabilah Bani Sulaimah. Ia telah membuat suatu berhala daripada kayu yang di namakannya Manat. Berhala itu diletakkannya dirumahnya sebagai biasa dilakukan oleh orang besar-besar kabilah itu dan disembahnya pada tiap-tiap masa yang perlu dan ada hajat.

Kemudian dua orang belia daripada bangsanya telah masuk Islam. Dengan bersembunyi keduanya mengambil berhala Umar lalu diletakkannya di lubang tempat orang buang air (kotoran) dan di songsangkannya kepalanya ke bawah, kakinya ke atas maksudnya supaya Umar itu tadi mengetahui kesesatan iktikadnya iaitu menjadikan berhala sebagai Tuhan yang di sembah dan meminta pertolongan pada hal dibuatnya sendiri daripada kayu.

Ketika pagi harinya sebagaimana biasa Umar datang kepada berhalanya untuk disembah dan dipuja tetapi di dapatinya berhalanya sudah tidak ada di tempatnya lalu dicarinya ke sana ke mari dan akhirnya di jumpanya sedang tersungkur dalam lubang pembuang najis penduduk Madinah : berhalanya itu tak dapat membersihkan dirinya sendiri daripada kekotoran zahir apa lagi akan membersihkan kekotoran zahir dan batil orang. Dengan terperanjat tercengang dan bingung lalu di angkatnya perlahan-lahan berhalanya itu dibersihkannya kotoran-kotoran yang melekat padanya. Kedua-dua belia itu tadi berulang-ulang melaku yang demikian tetapi Umar masih tetap tiada sedar daripada kesesatan dan kebodohnya dan ia pun berulang menyuci dan dibersihkan berhala itu daripada kotoran.

Setelah habis akalnya dan putus harapan iapun memberikan kepada berhalanya sebuah pedang yang terhunus dan tajam sambil berpesan kepadanya: "Hai berhalaku! Kalau betul engkau suci, nah ini sebilah pedang aku berikan kepadamu untuk mempertahankan dirimu daripada gangguan orang."

Pedang itu kemudian diletakkannya di tangan berhala tadi

lalu ditinggalkannya dengan kepercayaan berhalanya tadi akan mendapat menjaga dirinya sendiri daripada gangguan tetapi memangnya dasarnya berhala itu diperbuat daripada kayu, memangnya tak boleh berkata-kata, tidak mendengar seruan, mati tidak berjiwa walaupun diberikan senjata apa jua sudah tetap ia tidak boleh menjaga dirinya daripada serangan orang bahkan setelah tangannya diberikan pedang nasibnya lebih celaka dan lebih hina daripada kejadian yang telah lalu : kedua belia tadi bukannya mencampakkannya di lubang najis tetapi di lubang sumur mati dan di dudukkannya dekat bangkai anjing sedang pedangnya masih terhunus di tangannya.

Setelah Umar dapati berhalanya yang lebih hina itu putuslah harapan dan kepercayaannya kepada berhala itu bertambah kurang setelah Umar menerima nasihat daripada beberapa orang kawannya di tambah dengan penyaksian mata kepalanya sendiri tentang kesesatan menyembah berhala yakni sesat dan batil dalam iktikad lalu dengan tulus ikhlas ia berpindah memeluk agama Islam dan daripada ketika itulah berpindah ia daripada iktikad batil kepada iktikad hak, daripada bertuhankan berhala yang mati dan tidak berkuasa walau sedikit pun berpindah kepada bertuhankan Allah Subhanahu wa Taala yang gagah, maha kuasa lagi dapat memenuhi permintaan sekalian yang meminta – karangan Muhammad Ali dipetik daripada Majalah Al-Lisan.

(bersambung)

PERHATI

Dalam ruangan kopit pahit istimewa muka 37 bilangan yang lalu – ruangan pertama sepuluh dan sebelah baris dari atas berbunyi demikian : orang-orang di dalam mesyuarat itu sedang bilang terang-terang ia jadi perkakas - hendaklah dibaca demikian orang-orang di dalam mesyuarat itu dikatakan sudah bilang terang-terang ia jadi perkakas harap dengan ini pembaca-pembaca maklum.